

JACOBI GRETSERI
SOCIETATIS IESV
ADMONITIO,
AD EXTEROS
DE BIBLIIS TI-
GVRINIS.

Lutherus de Verbis Nouissimis Daudidis.
Tom. 3. Lat. VViteberg.

COEPERVNT ET NOSTRA ÆTA-
TE INTER PAUCOS ANNOS CRESCERE ET CVMV-
larinona versiones, ut videatur nullus modus futurus esse, & tandem tot
editiones Bibliorum sumus habituri, quot existent semidocti ac scoli,
qui sibi persuasionem alicuius eruditionis in lingua
Hebraica induent.


A N N O



M. DC. XV.

INGOLSTADII,

Ex Typographico Ederiano, apud Elisabetham
Angermariam, viduam.



ADMODVM
REVERENDO IN CHRI-
STO PATRI AC DOMINO,
DOMINO PAVLO, MONASTERII
TEGERNSEENSIS ORD. D. BENE-
DICTI ABBATI RELI-
giosissimo

IACOBVS GRETSERVS.



Contexui his diebus Amplissi-
me Præsul, dissertatiunculam
de Bibliis Tigurinis; quam ut
tuo nomini inscriberem; fecit
ipsa toties Tiguri & Tigurino-
rum repetita mentio: Cogitabam enim eti-
am in Bauaria, non procul ab Alpibus, Ti-
gurum & Tigurinum lacum esse, Auenti-
no in Annalibus nomenclatore & indice;
non tantum in Heluetia. Quanquam iis,
qui hac ætate in Heluetia Tigurinos, & Ti-
guri-

gurunorum Iulij Cæsaris posteros se vocitant; Et nomen & hanc tantam vetustatem viri docti abiudicant. Ex quorum numero Iacobus Spigelius ad versum illum Ligurini; *Nobile Turregum insedit: qui putant*, inquit, *Turregum olim dictum esse Tigurum, falluntur; siquidem Pagi Tigurini, cuius est mentio apud Cæsarem, sunt Uranienses; est autem Turregum novum oppidum, cui fluvius, Turga, ut ipsi regioni Turgavia nomen indidit.*

Vt cumque sit, (nolim namque de hac controuersia hoc loco iudicium meum interponere) quia compertum habebam, me non gratum munus allaturum, si hodiernis Tigurinæ Helvetiæ hanc lucubratiunculam offerrem, ad Bauariæ Tigurinos ire volui; ad te, inquam, *Admodum Reuerende Domine Prelate*, qui Tigurino Monasterio laudabiliter præses. Tu factum meum bonâ in partem accipies; ita tibi faueat, multosque annos adhuc concedat supremus ille vitæ humanæ moderator precibus S. QVIRINI Tigurinæ Aedis Diui Tutelaræ eximij: In golstadij 20. Iulij, Anno Salutis M. DC. XV.

AD.



ADMONITIO

AD EXTEROS DE BIBLIIS TI- GVRINIS.




Ideo multos, præsertim
exteros, errare circa Bi-
blia Tigurina, eorumq;
Auctores; quos, vt ab errore libe-
rem, breuem hanc lucubratiun-
culam confeci; licet ante aliquot
annos de his ipsis Bibliis non pau-
ca dixerim in Tractatu de nouis
Bibliorum versionibus, quem pri-
mo Tomo defensionis Bellarmi-
nianæ adiunxi.

A 3 Caput I.

ADMONITIO
CAPVT I.

Bibliorum Tigurinorum, qui Au-
ctores seu verfores.

 IGV RV M, seu, vt superioribus sæculis appellabatur, Turregum, seu Thuricum, primaria & clarissima Heluetiorum Urbsest; sed à Zvvinglio miserè seducta illis ipsis annis, quibus suos Saxones aliosque Germanos Lutherus in hæresin præcipitabat. Zvvinglio in auita fide euertenda indefessus adiutor fuit Leo Iuda, seu Iudæ, seu Iudas, origine Iudæus, postea Christianus, deinde Sacerdos, tandem flagitiosus Apostata, & Sacrilegus Sacramentarius: qui cum Hebraicam linguam vnâ cum lacte materno, vtpote verpus, vt dixi, suxisset; trāsfationem Bibliorum ex Hebræo non tantum Germanicam, sed & Latinam molitus est. At quo minus Latinam absolueret, mors intercessit: obiit enim iste Leo Tiguri anno Redemptoris 1542. die 19. Iunij, Ætatis anno LX. vt refertur in Chronico Chronicorum Tom. 4.

Quæ autem ipse verterit, quæ vertenda reliquerit,

querit, & cui, exponit nobis Leo in suprema sua ad Theodorum Bibliandrum, Scholæ Turegionensis Professorē & Ministrum, compellatione, quę præfationi in Tigurina Biblia inserta est, his concepta verbis. *Te autem, charissime mi Theodore, per ipsum Dominum Iesum, cui seruimus* (scilicet) *oro atque obtestor, ut ea tu in nostra Bibliorum versione absoluas, qua morbo hoc meo interceptus, transferre absoluerique non potui: Octo videlicet postrema capita Ezechielis, à quadragesimo nimirum capite: Daniele totum, librum Iob integrum, Psalmos siue Hymnos quadraginta octo ultimos, à 102. scilicet Psalmo. Libellos item Salomonis duos, Ecclesiasten & Cantica Canticorum, quos obrerum & orationis difficultatem hactenus non attigi, volens illos ultimo reservare conatus fui.* Hæc Leo ad suum Symmystam, & in Zvvingliana vinea cooperatorem: qui precibus locum dedit, & prætermissa à Leone in latinum sermonem ex Hebræo transtulit; libris tamen, quos Nouatores pro apocryphis habent, vt est Tobias, Iudith, Ecclesiasticus & similes, Petro Cholino demandatis. In nouo Testamento Erasmi versionem, sed abs se interpolatam, vsurparunt:

Atque

Atque hoc totum quatuor Interpretum, Leonis, Bibliandri, Cholini & Erasmi opus, *Biblia Tigurina* appellatur: quod in lucem venit vno post Leonis funera anno, nempe anno Salutis M. D. XLIII.

Huius operis exemplar typographus Christophorus Froschouerus eleganter compactum Lutherō misit VVitebergam; *Ille verò*, inquit Calvinista Hospinianus in Farragine sua sacramentaria, *eum monuit, ne posthac sibi aliquid mitterat, quod à Ministris Tigurina Ecclesia profectum sit: se enim nullum cum eis commercium posthac habere, & libros eorum, nec recipere, nec legere velle. Multos quidem labores eos sustinere, sed irritos & frustraneos, quandoquidem & ipsi iam damnati sint, & alios quoque miseros homines secum ad inferos abducant. Se itaque damnationis & blasphemiae doctrinae eorum nolle consortem esse, sed quoad vixerit & precibus & libris eos oppugnare constituisse.* Hanc nimirum gratiam Zvvnglianus Typographus pro munere misso retulit: cui occini poterat: *Egregiam verò laudem, & spolia ampla reportas, Tuque tuusque Leo.*

Caput II.

CAPVT II.

Roberti Stephani in Bibliis Tigurinis excudendis dolus.

IENNI O post publicata à Tigurinis Biblia, nimirum Anno M.D.XLV. Robertus Stephanus Parisiis nouam Bibliorum editionem adornans, cum vetere & vulgata translatione iunxit versionem Tigurinam, adiunctis in antiqui Testamenti libros Scholijs Vatabli, vt ipse quidem ait. Tigurinorum nomen vt & Leonis Iudæ, Bibliandri & Cholini diligenter suppressit; quia Parisiis, vbi tum degebat Robertus, haud satis tutum erat huimodi Versores & versiones euulgare. Res igitur fraudulenter agenda fuit vt & translatio Zvinglianorum (quibus iam tum Robertus sese addixerat) disseminaretur, & tamen dolus non à quouis animaduertetur.

Ex pluribus de Hebræo translationibus, que nostro tempore emerferunt, inquit Robertus, eam potissimum elegimus; quam veteri è regione apponeremus, que viris doctis videretur ceteris Latiniar.

B

nior.

nior. Cur non explicas, unde & à quibus hæc noua translatio, cæteris latinior, processerit? An id ignorabas? tam scilicet, quam tuum nomen ignorabas. Metuebas videlicet capiti tuo, si palam professus fuisses, cuius illa translatio esset. —

Pergis in tua præfatione. *Hanc nouam (Tigurinam) translationem, tametsi existimarem fidelem, & veritatē Hebraicam proximè exprimere, cum vellemus tamen cum aliorum versionibus, maxime autem Sanctis Pagnini conferre. Ecce commodum amici de prælectionibus Francisci Vatabli doctissimi Hebraicarum literarum professoris Regij nos admonent, neminem maiore vel eruditione, vel fide, magisque perspicua expositione sacros veteris Testamenti libros omnes, quos Hebraei receperunt, interpretatum esse: Multos esse eius diligentissimos auditores, qui percepta ab eo magna fide excepissent. Nec mora. Robertus Vatabli dictata conquirat, colligit, interpolat, euulgat, & indenouā translationem (hoc est Tigurinam) emendat & illustrat. Ait enim: Quæ vel subobscura erant in hac ipsa translatione (Tigurina) vel ab eius auctore parum diligenter perpensa, vel etiam ab Hebraica veritate interdum*

*dum aliena, ita indicauimus numeris aut aliis
notis, simulque exposuimus, vt quæ difficillima es-
se & obscurissima adhuc visa sunt, nunc plana fo-
re ac facilia confidamus.*

Tria ergo vetus Testamentum Roberti Ste-
phani continet, translationem veterem; nouam
Tigurinam, & scholia Vatabli in eos libros, qui
olim in Iudæorum Canone exstabant. Quan-
quam ferunt Vatablum hæc scholia à Stephano
edita pro suis non agnouisse, & grauissimè cum
Stephano, tanquam cum falsario, expostulasse,
nec Stephanum aliter crimen hoc diluere po-
tuisse, quam fuga ad Geneuenses, ablatis simul
typis regijs; vt scribit Genebrardus in Chrono-
logia, & in præfatione in opera Origenis ad Ca-
rolum IX. Christianissimum Francorû Regem:
vbi etiam ait; Vatablum Catholicæ Religionis
cultorem, omnisque nouitatis Hæreticæ aduer-
sarium fuisse: & in orthodoxa Ecclesia non tan-
tum laudabiliter vixisse, sed & piè obiisse.

In nouo Testamento adiunxit Robertus vul-
gatæ versionis translationem Erasmicam
prout id antea Tigurini fa-
ctitarant.

B 2

Caput. III.

CAPVT III.

Error communis de Vatabléa
Bibliorum versione.

EX facto & præfatione Stephani natus est error, Franciscum Vatablum Biblia ex Hebræo vertisse; eiusque versionem Robertum Stephanum suam in editionem intulisse. Sed reuera res aliter se habet, vt fatebitur, quisquis attente præfationem Stephani legerit; nam scholia duntaxat à Vatablo accepit, vel se accepisse finxit; quibus nouam illam hoc est, Tigurinā translationem illustrare, & alicubi etiam emendare voluit: nec hanc translationem, quam suis Bibliis adiunxit Stephanus, aliam esse, quam versionem Tigurinam Leonis Iudæ, Bibliandri, & aliorum, intelliget is, qui vnum vel alterum folium Roberticæ editionis conferre volet cum prima editione Tigurina; quæ, vt supra dicebam, prodijt anno Christi 1543.

Deinde idem planum fit ex Chronologia Ecclesiasticopolitica Tom. 8. Chronici Chronicorum; vbi hæc commemorantur ex Thuano. *An-*

no 1543. *Tigurina versio Bibliorum latinè edita est, opera Leonis Iuda, Pellicani, Bibliandri. Hanc Robertus Stephanus biennio post in sua editione ad veterem adiecit, suppressa eorum, qui in illa laborarunt, mentione: et Hispani Theologi diu post recognitam denuo Lugduni excudendam curauerunt. Est ergo Tigurina & Vatablina versio vna & eadē; quia Tigurina versio Vatablinę nomē tulit per errorē Lectoribus, & ipsi etiā Genebrardo in Chronologia, à Roberto obiectū: quanquā idem Genebrardus, Præfatione in Origenem ambigit, an versio hæc sit Vatablo adscribenda, propter ineptiam inquit, nam Vatablum aut malitiosissimum aut Hebraica lingua ignarissimum fuisse; si eius sit hæc versio: quippe quā pessimè potuit maximam partem & potiorē Scripturæ conuertit, velut de industria à litera & sensu discedens, & data opera aberrationem à veritate Hebraica appetens, ut cum dum lego, & cum Hebraico confero, mihi videar in alio mundo versari, & non sacras literas legere, sed fabulas è sacris literis deductas & delineatas, sed farragines è verbo Dei & humanis cogitationibus consarcinatas, quæ non tam ad veritatem, quam*

vertentis opinionem pertineant. Hęc Genebrardus. Fortè vehementius, vt Vatablum ab iniuria vindicet.

Verùm in hac translatione Vatablo adscripta, quæ reuera est Tigurina versio Leonis Iudæ, Bibliandri & Cholini; & in Testamento nouo, Erasmi, tametsi interpolata; & in scholiis sub Vatabli nomine adiunctis, esse aliquid, quod viros doctos & sacrarum literarum studiosos iuuare, & ad abditos scripturæ sensus penitus inuestigandos promouere possit; argumento est Index Concilij Tridentini, à Sixto V. & Clemente VIII. recognitus & auctus, in cuius tertia Regula hæc leguntur. *Librorum veteris Testamenti versiones, viris tantum doctis & piis, iudicio Episcopi, concedi poterunt: modò huiusmodi versionibus tanquam elucidationibus vulgata editionis ad intelligendam sacram scripturam, non autem tanquam sacro textu vtantur. Versiones verò noui Testamenti ab Auctoribus primæ classis huius Indicis factæ, nemini concedantur, quia utilitatis parum, periculi verò plurimum lectoribus ex earum lectione manare solet. Si quæ verò annotationes cum huiusmodi, quæ permittuntur versionibus,*
vel

velcum vulgata editione circumferuntur, expū-
ctis locis suspectis à Facultate Theologica alicuius
Vniuersitatis Catholica, aut Inquisitione gene-
rali permitti eisdem poterunt, quibus & versio-
nes. Quibus conditionibus totum volumen Bi-
bliorum, quod vulgo Biblia Vatabli dicitur, aut
partes eius concedi viris piis & doctis poterunt.
Hactenus Index. qui rectè dicit: Volumen illud:
Vulgò Biblia Vatabli dici, quia appellatio hæc
ex vulgari persuasione exstitit, Vatablum non
tantum Scholiorum, sed & ipsius versionis no-
uæ ad veterem à Roberto adiectæ Auctorem
esse: quod secus est; vt vidimus.

Indicis Tridentini hortatu videntur Theolo-
gi Salmanticenses in Hispania excitati, vt ex his
Bibliis Vatablo adscriptis errores expurgarent,
opusque emaculatum liberè lectioni permitte-
rent; & Salmanticensibus typis subijcerent;

Anno Domini 1584. teste Posseuino in

Apparatu.



Caput IV.

ADMONITIO
CAPVT IV.

Excutiuntur in gratiam pij & Catholici lectoris, quę in Clypeo concionatorum verbi diuini de Bibliis Tigurinis perperam traduntur.

ANNO 1613. editus est Venetijs liber, cui inscriptio: *Clypeus Concionatorum verbi diuini, Auctore Ferdinando de Escalante Hispano, ordinis sanctissima Trinitatis, & Redemptionis captiuorum*, in cuius libro sexto, cap. vlt. mira prorsus de Tigurina translatione, eiusque interpretibus percensentur, quę ego recitabo, non vt quenquam insecter, sed vt veritatem patefaciam, errandiq; occasione alijs præcidam; præsertim exteris, & illis maxime, qui in media Hispania degentes, hæreticos minus norunt, quam nos, qui inter illos viuimus.

Distinguit ergo scriptor iste. I. versionem Vatablinam à Tigurina, cum sit vna & eadem, vt supra dictum.

II. Di.

II. Dicit se diu *miro desiderio videndi Biblia Tigurina* flagrasse. Atqui toties videbat, quoties illa, quæ Vatablea vocantur, oculis vsurpabat; sunt enim vna eademque, nec aliunde distinctionata est quàm ex errore, cuius dissimulatione sua & orationis perplexa ambiguitate Robertus Stephanus caussa fuit.

III. Dicit, *se tandem in ista Biblia incidisse apud Episcopum Giennensem*. Bene factum; Decebat, vt tandem tanta sitis leuaretur; ne nimium cruciaret.

IV. Dicit, *hec Biblia fuisse elaborata studio & diligentia Leonis Tigurina Ecclesia Episcopi*. Leo Iuda nunquam fuit Episcopus; sed hæreticus sacramentarius. Nec Tigurum seu Turegum est Episcopalis ciuitas, sed est sub Episcopo Constantiensi, cuius diœcesis fines suos latissimè profert.

V. Dicit, *Leonem pio Zelo feruidum, nouam Bibliorum versionem aggressum esse*. Atqui ego planè mihi persuadeo, Leonem non alio consilio nouam translationem suscepisse; quàm vt veterem in contemptum adduceret; & vt suam quoque Hebraicæ linguæ peritiam mundo vendicaret: quia enim tunc nouis versionib. omnia

redundabant, turpe futurū credebat, si ipse domo Apella, & in Iudaismo procreatus; nihil in hoc genere auderet: neque Zyvinglianismum suum hoc fulmento fulciret.

VI. Dicit, *Leonem in transferendo veteri Testamento usum esse Hebraico exemplari emendatissimo, ut & Græcis atque Latinis editionibus, unde lectionis veritatem putauerit esse petendam; neque neglexisse, quæ de genuino & germano sensu passim tradiderunt Orthodoxi Interpretes.* Hæc quidem præfatio Tigurinis Biblijs præfixa magnificè de Leone iactitat, sed num tanto hiatu dignum quid Leo præstiterit, dubitabit, qui quæ supra de his Biblijs Genebrardus scripsit, perpenderit, quique simul attenderit, quam sæpe versio hæc à Roberto Stephano ad ferulam & scuticam vocetur.

VII. Dicit, *plurimum adiutum esse opera & industria clarissimorum virorum.* Clarissimi isti viri omnes fuisse Heretici, perditæ Sacramentarij: partim quoque Monasticorum ordinum desertores, ut Bibliander, Pellicanus, Cholinus, Rudolphus Gualterus, & eiusdem sentinæ alij.

VIII. *His præsidis subnixum, latinam suā translationem*

lationem sincere ad veritatem Hebraicam accommodare studuisse. Quæso, quæ sinceritas in Sacramentario, & in votifrago sacerdote, qualis iste Leo? IX. Dicit; *Corpusculum optimi viri, senio iam debilitatum, & laboribus fractum, diutius tantum onus sustinere nequivisse.* Non optimus, sed pessimus & nocentissimus vir fuit Leo Iudas, utpote post defectionem suam à Catholica Ecclesia & Sacerdotio, in id vnum intentus, quomodo quâ latissimè sacramentariam Hæresin propagaret: Qua in re ne capitalibus quidē fraudibus abstinent, ut cū sub emētito nomine Ludouici Leopoldi, Anno 1526. edidit Germanice hūc libellum: *Doctissimi Erasmi Roterodami ac Martini Lutheri sententia de cæna Domini nostri Iesu Christi:* In quo Germanicæ plebeculæ tunc potissimū ob sacramentarios tumultuanti persuadere conatur, Erasmi & Lutheri doctrinam à dogmate Zyvingliano, quoad hoc caput, nihil penitus discrepare. Quod quàm verum fuerit, norunt omnes, qui vel modice libros Lutheri contra Sacramentarios degustarunt, & ipse mox Erasmus palam ostendit, sibi ab isto tenebrione luculentam iniuriam irrogatam esse.

X. Cum narrasset ex præfatione, quomodo Leo, desperatâ iam vitâ, Theodorum Bibliandrum & alios obtestatus fuerit; vt imperfecta perficerent, & quæ vertenda restabant, verterent; subiungit: *Leonem felicissime migrasse ad Dominum.* Vtinâ. Sed si mors peccatorum pessima est, quanto magis pertinacissimorum Sacramentariorum; quorum mors non est ianua ad vitam; sed aditus ad mortem secundam. *Felicissime migravit ad Dominum.* Ille né, qui tot millia animarum à veritatis tramite abduxit, & ad perfidiam Zvvinglianâ traduxit? Ille né, qui cum sacerdos esset, in fictio matrimonio vsque ad extremum anhelitum vixit, nullis vnquam pœnitentiæ indiciiis editis, ne in fatali quidem illa hora; cui tunc vxor & liberi potius curæ erant, quam malè commissorum detestatio; nam vt præfatio ait; *Commendabat in primis Ecclesiam Dei,* (rectius dixisset, Zvvinglij) *hinc uxorem suam & liberos, mox viduam & pupillos futuros.* Ex quibus verbis Auditor iste, si animum aduertere voluisset, facile intelligere poterat, quis & qualis Leo iste *Episcopus* fuerit: neque enim in Catholica Ecclesia vxor & liberi lectulum inoribundi Episcopi circumfere-

dere,

dere, & flebilibus lamentis commendationes
quærere solent. Noui, Zvvinglium sibi & suis
Episcopi titulo blanditum esse, ita vt quot Tiguri
versabantur Pastores, tot *Episcopos* numeraret,
vnde & Leo Pastor ad S. Petrū, Zvvinglio *Episco-*
pus erat; sed cum tales *Episcopos* ignorauerit an-
tiquitas, & illa etiam ætas, quæ Zvvinglium pro-
ximè antecessit, meritò *Episcopos* istos in rem
malam abire iubet, quisquis salutis suæ curam
gerit.

XI. Dicit Auctor iste, *Bibliandrum* & *Pelicanū*
citissime & *diligentissime*, quæ promiserant, præs-
tisse. De celeritate, non abnuo; nam sequenti à
morte Leonis anno, hoc est, 1543. Biblia Tiguri-
na in publicum prodierunt. De diligentia, &
quidem summa illa dubito; quia raro cum insi-
gni celeritate insignis diligentia cōiungi potest;
deinde, quia, ea, quæ Genebrardus de hac versio-
ne scribit, & tot obeli, asterisci, lunulæ, quibus
eam Robertus Stephanus signauit, haud tantam
diligentiam, quanta hīc prædicatur, arguunt.

XII. Dicit Leonem hunc suum laborem dicatum
voluisse fidelissimis & religiosissimis fratribus, pa-
storibus verbi & Ecclesiarum Ministris per agrū

Tigurinum; & hinc translationem hanc Tigurina nomen sortitam esse. Siccine fidelissimi & religiosissimi illi sunt, qui perditionem Tigurinam, quæ amplissima est, Zvvinglianum Euangelium prædicant, vt Euāgelium Christi expellant? Siccine fidelissimi & religiosissimi illi; quos ob Sacramentariam hæresin, Hispani in cineres verterent, si in eorum manus inciderent? Siccine his encomiis digni sunt, quos ipsemet Lutherus habuit pro portentis potius, quam pro hominibus; vndique, intus & extra, à Diabolo obsessis & circumseptis?

XIII. Petrum Cholinum & Rudolphum Gualterum vocat *optimos & doctissimos viros*: Sacramentarius fuit vterque; quomodo ergo vir *optimus*? Spuriam Zvvinglij, qui prius Sacerdos fuerat, connubio sibi iunxit Gualterus, qui *optimi* viri elogium non mereretur, licet nihil aliud bonitati aduersum patraffet; quam hoc, quod flagitiosi Apostatæ notham sibi despondit.

Et ita quidem res sese habet cum Bibliis Tigurinis, cuius translatores quales fuerint, licebat scriptori huic vel ex ipso librorū prohibitorū Indice discere: omnes enim inter Auctores primæ classis

classis annumerantur. Quære & vide, an non quemlibet sua in statione reperturus sis, Leonē dico Iudam; Theodorum Bibliandrum, Conradum Pelicanum, Petrum Cholinum, Rudolphum Gualterum, quos ex ignorantia scriptor iste tanquam viros Catholicos, optimos & doctissimos dilaudat; sed venia danda est; Beatus ille, qui tam procul ab hæreticis habitat, vt eos ne nouerit quidem.

Ait Auctor; *prohiberi Biblia Tigurina sed in mediocri forma; in folio, cōcedi, seruata forma, ordine, & censura, præscripta à Reuerendissimo Ferdinando Valdesio, Archiepiscopo Hispalensi, & Inquisitore generali.* Ego nihil aliud scio, quam Biblia Tigurina siue in minore siue in maiore forma eiusdem prorsus speciei esse; hoc est, ex Hæreticorum Zvvinglianorum & Sacramentariorum officina processisse; additis passim eorundem scholiis & annotationibus: De cuius generis Bibliis ita decreuit Index Concilij Tridentini. *Biblia Hæreticorum operâ impressa, vel eorundem annotationibus, argumētis, summariis scholiis & indicibus referta, omnino prohibentur.* Quāquam Regulā tertiā permittitur huiusmodi

di Bibliorū quoad vetus Testamentum, vsus, sed
viris tantū doctis & piis, idque iudicio Episcopi,
& expunctis locis suspectis ex annotationibus
si quashabent: Et hoc per Facultatem aliquam
Theologicam, aut Inquisitionem generalem;
prout in Bibliis Roberti Stephani, quæ Vatablea
nominant, fecerunt Theologi Salmanticenses,
& Illustrissimus Archiepiscopus Toletanus Gas-
par Quiroga in Indice expurgatorio, qui editus
est Madriti Anno Christi 1584. Quare hunc in
modum Biblia Roberti Stephani, seu, vt appel-
lant, Vatabli; in quibusetiam insunt Biblia seu
versio Tigurina; conceduntur, vtrum autem Bi-
blia Tigurina seorsim & extra Roberti Editionē,
alicubi correctā & expurgata fuerint, incōper-
tum habeo. Hoc mihi liquet; nullū fore Catho-
licū correctorē, qui nō vel ante omnia inde eie-
cturus sit præfationem, in qua de interpretibus,
deque interpretationis consilio agitur. Nec ego
vidi in hæc Biblia censuram Archiepiscopi Hi-
spalensis, quā auctor *Glypei* citat: nec formā, nec
ordinē legendi illa Biblia ab eodem præfule præ-
scripta; vt dicit Auctor. Suspicio tamen, si Tigu-
rinorum Bibliorum verfores tam noti essent ex-
teris,

teris, quam sunt nobis Germanis; multos, qui ea nunc nescio quo loco habent, eodem in pretio habituros, quo versiones aliorum Nouatorum: Omnes enim Tigurinæ translationis vel conditores, vel adiutores fuere teterrimi Sacramentarij; qui fortissimam & bellicosissimam Helvetiorum nationem ab auita & patrita religione sacrilege abduxerunt; Etsi non totâ, gratia enim Deo & coelitibus, perstant perstabuntq; (ita Deus faxit) constantissime in Catholica fide ex Heluetiis plurimi, qui Turegiensi Baali adeo sua genua nō incuruarunt, vt eundem in aciem cum suis progressum, trucidauerint; & non tantum Letho, sed & Orco demiserint; corpore etiam in cineres redacto.

Nec, vt arbitror, Clypei Architectus male ad hanc versionem Tigurinam accommodauerit extrema verba libri sui sexti. *De aliis hæreticorū translationibus putridis & peruersis, in angulis & conuenticulis, suggestionē Sathanae, confectis, non est opus pertractare, sed admonere fideles, si quid translationis occurrerit, quod nō sit alicuius Auctoris approbati, è numero scilicet eorum, de quibus locuti sumus:* (Atqui Leo Iuda, Bibliander &

D

alij,

alij, de quibus supra, non sunt Auctores appro-
 bati; sed damnatæ memoriæ ad vnum omnes)
ut talem interpretationem suspectam semper ha-
beant, & cautè legant, ut cunque speciem & appa-
rentiam boni præferre videatur. Rectè. Sed to-
 rum hoc in Biblia quoq; Tigurina quadrat, cu-
 ius artifices ne vno quidem pilo veritati & Ec-
 clesiæ Catholicæ addictiores fuere, quam Mun-
 sterus, Castaleo, Iunius, Tremmelius, & alij Secta-
 rij qui vel tota vel partem Bibliorum ex Hebræo
 sermone in latinum transtulerunt.

Ait Auctor Clypei. *Typographorum incuria,*
& iniuria maleuolorum Codices quosdam (Biblio-
rum Tigurinorum) in lucem produsse primis disti-
millimos & corruptissimos. Qui nam isti maleuo-
 li Zvvinglianorum, qui Biblia in *minore forma*
 adeo deprauarunt, ut eorundem vsum ac lectio-
 nem necesse fuerit prohibere? Num Robertus
 Stephanus in Tigurina Biblia tam iniuriosus fu-
 it? Atqui ipse in ipso contextu nihil mutauit, sed
 in scholiis & annotationibus ostendit, quid, suo
 iudicio, perperam versum fuerit, & quid melius
 verti potuerit. Nec Catholicos huius corruptio-
 nis accusare fas est: nam quid Catholicis cum

Bibliis

Bibliis Tiguri Zvvinglianorum operâ elaboratis? Nec Lutheranos hic suspectos habere licet; quia & Zvvinglianos & Zvvingliana Biblia eodem loco habent; nec quidquam illis magis est in optatis, quam vt tam illi, quam ista quanto-
 cyus cum Zvvinglio sepeliantur, & sempiterna obliuione obruantur. Nec credibile mihi fit, ipsos Tigurinos Zvvinglianos, Leonis Iudæ & Bibliandri posteros, violentas manus Bibliis istis attulisse, & plus luis ac pestis affricuisse, quã primi conditores affricuerant. Ego non vidi nisi primas editiones; illã scilicet in *folio Regali*, quæ fuit omniũ prima, euulgata anno 1543. Et alterã Anni 1544. in *quarto maiore*, vt vocant; & aliã eiusdem anni in *octauo maiore*: nam, vt sunt ingenia pleraq; ad nouitatẽ prona, vix Typographus satis exemplariũ excudere poterat simulatq; Leo iste Iudas & Bibliander cum sua noua versione comparuerunt. Nec cuiquam res hæc felicius cessit, quàm Typographo Tigurino & Bibliopolis, quibus noua hæc Biblia rei faciendæ, & loculos farciendi insignem occasionem præbuerũt. In ea tamen sum opinione, si quis primas editiones, quacunq; tandem forma excusas, cum po-

terioribus componere velit; omnes apparituras
sorores, & propè gemellas, Spiritu Zvvingliano
egregiè tinctas atque delibutas.

Videtur autem *Clypei* Auctor delectari versibus; laudat enim versionis Tigurinæ fabros, quod singulorum capitum summaria à Rudolpho Gualtero carminibus inclusa addiderint; *Vt mira*, inquit, *suauitate permulceant lectorem affixerunt uniuerso argumenta singulorum capitum carmine comprehensa*, à doctissimo viro Rudolpho Gualtero in gratiam & usum studiosorum composita. Fieri potest, vt quid sit suaue nec sentiam, nec intelligam. Mei sauribus & animo carmina illa plus de inconditis rupibus & cauti-
bus Heluetiæ, quam deliterato Helicone insonare videntur; tantum abest, vt mira suauitate me permulceant, Quæ enim suauitas in istis?

Pro templo Salomon ligna cedrina petit.
Itane *cedrina*, mediâ longâ, petij? Atqui in toto Libano Rex Hiram non habebat *Cedrina* longa, sed tantum *Cedrina* breuia. Quam suaui hic versiculus:

Vt tulit, officium ad mox Helisea vocat.
Cuius tandem declinationis *Helisea*, pro, *Heli-
seum*,

saum, ab Helisæus, nisi Zyvingliana licentia, εἰς οὐδὲν, vt ἰδύσσεν scribingum putarit; sed vnde tunc diphthongus illa æ? An ideo tantum adhibita est, vt Helisæus fieret longus, cum ratio carminis breuem non ferret? Quāta suauitas spirat existis amulsis & ametrīs metris?

Hinc atrium ac oleum postulat inde Deus.

Et discit quo sint hac celebranda ritu.

Fervida vt absūmitur crepitantibus ignib. olla

Adimit huic regnū, quod dedit ante, Deus.

Conuitiis Mosen vexant fraterq. sororq.

Vt taceam alia vitia prorsus puerilia; qualia Gorgias, Lysias, vltima breui: nihil quē dicam de ipsa integra compositione, quæ tota est inepta, infusa, & plena inconditi & inculti rurs. Nec spiritus Zyvinglianus à se impetrare potuit, quo minus venena sua subinde aspergeret; nisi forte hæreticum venenum non est; quod araneus iste ex Bestia Apocalypica suxit:

Altera consurgit blasphemus bestia vultu,

Quam si Pontificem dixeris esse; licet.

Nec mihi quidquam magis placet in his inuersis versibus, quàm quod in editionibus Bibliorum Tigurinorum *minoris formæ* omissi sunt:

neque eos Bibliis suis dignatus est Robertus Stephanus.

At nihilne ad hanc Pandoram decorandam attulit Pelicanus? Audi præfationē. Annotatōnibus (marginalibus) *adiexit Pelicanus alterius generis annotata per opus integrum, locos videlicet communes, & quæ in singulis capitibus memorabilia, & in primis obseruanda videntur, mirifice lectoris memoriā adiuuantia, locos item similes & dissimiles, ac quibus obscuriores vel breuiores, alibi verò illustriores copiosioresque inueniuntur.* En præclarū Pelicani donum, longè nimirum præstantius, quā fuerit illud Mercurij, qui Hesiodæ Pandoræ tribuit *κυνόταυρον, καὶ ἐπικλοπὴν ἦθος, caninam mentē, & mores fallaces;* nisi fortè quis arbitretur, me neutiquā dissentiente, pādorē huic Tigurinē ab omnibus suis architectis datum id, quod vnicus Mercurius poëtici illi Pādorē dederat, quorsum enim omniū istorum conatus aliter spectabat, quam vt per hanc fucatā translationem plurimi in Zvvinglianā nassam pellekti deciperētur, & à prisca fide ad perfidiam traducerentur?

Et hæc de Bibliis Tigurinīs.

Superiorum Permissu.

Luthe-

Lutherus in Commentario de Nouissimis verbis Dauidis.

Noui isti Interpretes tam variis & discrepantibus interpretationibus, Grammaticis distinctionibus, punctationibus, textus Bibliorum tam misere lacerant & dissepunt, ut si ipsos interpretes sequi velimus, nunquam habituri simus Biblia una aliqua certa & concordis sententia enarrata aut intellecta, quoniam suam quisque Rabinorum interpretationem aliis praeferri vult. Quid, quod ipsi coguntur fateri multis in locis se nondum intelligere sua linguae vocabula? Tantum abest, ut ubique puram & consentientem Bibliorum explicationem habeant; quod ad Grammaticam sententiam attinet, ut de Theologica taceam, cuius prorsus nihil habent.

Idem Ibid.

Profecto non est utilis Ecclesiae opera & studium Rabinorum & Grammaticarum Iudaizantium, & sententias in Ecclesiam inuehendi; nam illa etiam sine studio per sese nimis facile & pertinaciter haerent. Et ipsa litera seu textus à Iudaïs recepta superstitiosa observatio, & aliorum interpretum auctoritas & exempla, facile caliginem offundunt, ut interim amissa vera sententia & intellectu de Christo, ubi non oportuit, Iudaica imaginationes nobis incantis obrepant. Quemadmodum omnibus interpretibus video euenisse, ac ne me quidem excepto. Benefactum, quod te ab Haëreticorum Interpretum & Versorum genio & indole non excepisti; quia si excepisses, omnes contra te insurrexissent, & ad tributum suum, tanquam perfectum contribulem, reduxissent.



